

# Dathlu Pen-Blwydd y Gymraeg ym Mhrifysgol Caerdydd

1883-2008  
**125**  
YEARS BLYNEDD

PRIFYSGOL  
CAERDYDD  
CARDIFF  
UNIVERSITY

125 o flynyddoedd yn ôl, cafwyd Siarter Frenhinol a newidiodd wyneb addysg yng Nghymru drwy sefydlu Coleg Prifysgol De Cymru a Mynwy – Prifysgol Caerdydd, bellach. Penodwyd John Viriamu Jones yn Brifathro cyntaf, yn 27 oed, ac agorwyd y Coleg ar 24 Hydref 1883 gyda 13 o staff academaidd a 151 o fyfyrwyr. Erbyn heddiw mae'r coleg bach hwnnw wedi tyfu yn un o'r prifysgolion mwyaf ei pharch a mwyaf poblogaidd ym Mhrydain, gyda 5,674 o staff a 25,997 o fyfyrwyr. Yn wir, yn ddiweddar fe'i rhestrwyd ymhlith y 100 prifysgol orau yn y byd.

O'r cychwyn cyntaf, roedd yn y Brifysgol yng Nghaerdydd Adran y Gymraeg. Hon yw un o'r adrannau Cymraeg cyntaf oll, ac yma mae'r Gadair Gymraeg sefydledig hynaf yng Nghymru. Hon hefyd oedd yr adran Gymraeg gyntaf i ddysgu'r pwnc trwy gyfrwng y Gymraeg. Am dros ganrif y mae wedi cyfrannu'n helaeth i fywyd Cymru ac wedi bod yn gartref i ysgolheigion a llenorion amlwg, gan gynnwys W. J. Gruffydd, G. J. Williams, A. O. H. Jarman a Saunders Lewis. Dros y blynyddoedd, mae Ysgol y Gymraeg ym Mhrifysgol Caerdydd wedi datblygu i fod y fwyaf yng Nghymru, a chanddi 38 o staff llawn-amser.

Mae'r Ysgol yn rhoi pwyslais mawr ar roi'r Gymraeg a'i diwylliant mewn cyd-destun rhyngwladol. Mae'n gartref i'r Ganolfan Uwchegyrdiau Cymry America ac i'r Uned Ymchwil Cynllunio, Iaith a Pholisi, sy'n cymharu'r sefyllfa ieithyddol yng Nghymru â'r sefyllfa mewn rhychwant eang o wledydd ar draws y byd. Cynhelir y Gynhadledd Faledi Ryngwladol yma eleni, tra bo cysylltiadau cyffrous ar fin dechrau gyda Phrifysgol Patagonia yn Nhrelew ac â Phrifysgol Nanjing yn China. Mae ein Cynorthwywyr Ymchwil yn dod o Batagonia, Canada, UDA, Siapan – a Sir Fôn! – a phob un ohonynt yn siarad Cymraeg yn rhugl.



Ond wedi dweud hynny, Cymru a Chaerdydd yw ein blaenoriaeth. Ers blynyddoedd bellach, rydym wedi bod yn cydweithio â'r Amgueddfa Werin i gynig MA mewn Astudiaethau Gwerin; ers tair blynedd rydym wedi bod yn gweithredu'r Cynllun Sabothol Cymraeg ar ran Llywodraeth y Cynulliad; ac mae ein Canolfan Cymraeg i Oedolion yn gwasanaethu'r gymuned leol drwy ddysgu'r iaith i dros 1,700 o oedolion yng Nghaerdydd a Bro Morgannwg. [www.caerdydd.ac.uk/cymraeg/canolfan/](http://www.caerdydd.ac.uk/cymraeg/canolfan/)



## Gwefan Newydd Sbon

### Dysgwch fwy am:

- yr Ysgol a'r staff
- ein myfyrwyr cyfredol
- ein gwaith ymchwil
- sut i wneud cais drwy ymweld ag [www.caerdydd.ac.uk/cymraeg](http://www.caerdydd.ac.uk/cymraeg)

## Astudio... a mwynhau!

### Gall myfyrwyr Ysgol y Gymraeg fanteisio ar gyfleon lu i gymdeithasu a mwynhau drwy gyfrwng y Gymraeg.

- Y Gym Gym
- Aelwyd y Waun Ddyfal
- Aelwyd CF1
- Menter Caerdydd
- Undeb y Myfyrwyr, y gorau ym Mhrydain (*The Independent*)


## Rhaglenni Gradd

### BA yn y Gymraeg


- graddau BA (sengl a chydanhwydd)
- gradd LLB (Y Gymraeg a'r Gyfraith)
- dewis eang o fodiwlau gan gynnwys cynllunio ieithyddol, gwleidyddiaeth a phropaganda, llenyddiaeth plant, ysgrifennu creadigol
- cyfle i wneud profiad gwaith yn rhai o brif sefydliadau Cymru

### Graddau Uwch

- MA yn y Gymraeg
- MA mewn Astudiaethau Gwerin
- MPhil/PhD mewn meysydd megis llenyddiaeth ganoloesol a modern, cymdeithaseg iaith, Cymru ac America, hunaniaeth ac amlddiwylliannedd, theori perfformio, ysgrifennu creadigol



Huw Foulkes, enillydd y Fedal Drama yn Eisteddfod yr Urdd, 2008



Ifan Fleming, enillydd y Goron yn Eisteddfod Ryng-golegol 2008

## Canolfan Uwchfrydiau Cymry America

Sefydlwyd Canolfan Uwchfrydiau Cymry America yn 2001 er mwyn hybu astudio diwylliant, iaith, llên a hanes y Cymry ar gyfandiroedd America, ac yn enwedig yn yr Unol Daleithiau, Canada a Phatagonia. Trwy drefnu seminarau, darlithoedd a chynadleddau, trwy gyhoeddiadau, a thrwy hybu cydweithio a chyd-drafod ysgolheigaidd, ei nod yw bod yn ganolbwynt i rwydwaith rhyngwladol o ysgolheigion sy'n ymddiddori mewn maes astudio sydd ar gynydd cyflym.



## Uned Ymchwil Iaith, Polisi a Chynllunio

Sefydlwyd yr Uned Ymchwil Iaith, Polisi a Chynllunio yn gynnar yn 2005 er mwyn ffurfioli diddordebau ymchwil yn Ysgol y Gymraeg ym maes dadansoddi polisi iaith, datblygu methodoleg ac astudiaethau ymddygiad ieithyddol. Nod yr Uned yw arwain datblygiadau cenedlaethol a rhyngwladol ym maes cynllunio ieithyddol. Rhoddir pwyslais arbennig ar ddeall goblygiadau cymdeithasol, economaidd ac amgylchfydol iaith yn hanesyddol a daearyddol. Y pum thema sydd yn rhoi ffocws i waith yr Uned yw:

- dwyieithrwydd yn y cyd-destun Cymreig
- polisi a chynllunio ieithyddol cymharol
- dadansoddi daearyddol a gofodol;
- materion llywodraethiant, hawliau lleiafrifol a lluosrywiaeth
- cynllunio gofodol, amlddiwylliannedd ac amlieithrwydd.



## Arbenigedd y Staff

Mae diddordebau ac arbenigedd staff yr Ysgol yn rhychwantu'r Gymraeg, ei llenyddiaeth, ac elfennau cymdeithasol a rhyngwladol lleiafrifoedd ieithyddol.

Ar yr ochr ieithyddol, mae diddordebau ymchwil y staff yn cwmpasu sosioieithyddiaeth y Gymraeg yng Nghymru a thu draw i Gymru, e.e. yn y Wladfa a'r UDA, cymdeithaseg iaith, cynllunio ieithyddol a pholisi iaith yng Nghymru, Ewrop a Chanada. Ar yr ochr lenyddol, mae'r diddordebau ymchwil yn cynnwys rhyddiaith a barddoniaeth yr Oesoedd Canol, crefft y cyfarwydd, llên a chwedlau gwerin, hanesyddiaeth a llenyddiaeth, yr emyn a'r faled, astudiaethau merched, llên De Ddwyrain Cymru, theori a beirniadaeth lenyddol, llenyddiaeth plant, ac amryw agweddau ar lenyddiaeth yr ugeinfed ganrif. Yn pontio rhwng iaith a llenyddiaeth mae diddordebau eraill, gan gynnwys theori a methodoleg trosi, cyfieithu a golygu, hunaniaeth ac amlddiwylliannedd, theori perfformio, ac astudiaethau ar grefydd y Cymry.



## Pynciau Myfyrwyr Ymchwil Cyfredol

- Spatial Language Planning: Case Study of the Welsh Language
- Swyddogaeth Ysgrifennu Creadigol yn y Wasg Gymraeg yn y Wladfa
- Cyfraniad Hyfforddiant Ymwybyddiaeth am yr Iaith Gymraeg ar Gynllunio Ieithyddol a Disgwrs Ôl-drefedigaethol yng Nghymru
- Dafydd ap Gwilym a damcaniaeth Ôl-drefedigaethol
- Rheolaeth Strategol Cynlluniau Iaith
- Second Language Acquisition (Welsh) and Urban Social Networks
- Representations of Nationalism in Welsh Writing in English, 1925-1966
- Memoir and Identity in Welsh Patagonia
- Ymateb Cymry America i Genedlaetholdeb Plaid Cymru, 1925-1945
- Law and Minority Language Rights
- Rhyddiaith y tir diffaith. Delweddau o feichiogrwydd, mamolaeth, ffrwythlondeb a rhywioldeb yng ngwaith nofelwyr benywaidd Cymraeg, 1948-2008
- Cofiannau Owen Thomas, Lerpwl
- Y defnydd o'r iaith Gymraeg o fewn y Diwydiant Teledu



## Llenyddiaeth Plant


Yn ogystal â'i diddordeb yn y traddodiad baledol, mae'r Dr Siwan Rosser hefyd yn ymddiddori yn swyddogaeth ac arwyddocâd llenyddiaeth plant yn ei chyd-destun hanesyddol, diwylliannol a chysyniadol. Byddai'n croesawu ceisiadau gan fyfyrwyr sy'n dymuno ymchwilio yn y maes, gan gynnwys pynciau megis:

- llenyddiaeth i ferched/bechgyn a delweddau benywaidd/gwrywaidd
- cenedligrwydd a hunaniaeth Gymreig mewn testunau i blant
- genres megis straeon hanes/ffantasi/antur/domestig



## Comisiynwyr Iaith

Mae'r Athro Colin Williams wedi ennill grant ymchwil gan yr Academi Brydeinig i archwilio systemau rheoleiddio iaith yn yr UDA, Canada ac Iwerddon. Pwrpas yr ymchwil yw casglu tystiolaeth o ymarfer da a data ar yr amryw ffyrdd o sicrhau hawliau ieithyddol ac archwilio cwynion mewn cyd-destunau gwahanol. Bydd hwn yn sail i'r hyn a all ddigwydd yma yng Nghymru, ac efallai yn Yr Alban a Gogledd Iwerddon pe bai Comisiynwyr Iaith yn cael eu hapwyntio.



## Prosiect Perfformio o'r Pulpud

*Dwyn seren y gorffennol  
A'i ddawn ir o ddoe yn ôl*

Ydych chi'n cofio'r hen bregethwyr ers talwm? Oes 'na bregethwyr neu oedfaon hynod wedi aros yn y cof? Os oes gennych awydd rhannu atgofion, neu os ydych yn gwybod am unrhyw rai y dylem eu cyfweld, yna cysylltwch â ni. Mae casglu tystiolaeth lafar yn rhan bwysig o'r prosiect hwn sydd yn canolbwyntio ar astudio pregethu drammatig y bedwaredd ganrif ar bymtheg a'r ugeinfed ganrif.

## Cyhoeddiadau ar Wefan yr Ysgol

**Gwefan Rhyddiaith Gymraeg 1350-1425**  
Yr Athro Peter Wynn Thomas, Dr Diana Luft, a Dr Mark Smith

Gwefan sy'n cyflwyno corff chwiliadwy o ryddiaith yr Oesoedd Canol. Gellwch weld cynnwys 28 o lawysgrifau yma: rhyw 1.8 miliwn o eiriau. Mae'r llawysgrifau'n ymgorffori dros 100 o destunau ar wahanol feysydd. Adnodd amhrisiadwy ar gyfer ymchwil pellach i iaith, llenyddiaeth, hanes a diwylliant y cyfnod.



**Gwefan Baledi Cymru**

Dr E. Wyn James

Dros y blynyddoedd bu'r faled yn ffurfio bwysig a dylanwadol ym mywyd cymdeithasol a diwylliannol Cymru. Hwyluso astudio baledi Cymru yw diben y wefan hon.

**Peredur: Golygiad Lleiafol**

Yr Athro Peter Wynn Thomas

Golygiad o *Peredur*, un o chwedlau'r *Mabinogion*.

**Deddfwriaeth Newydd a'r Gymraeg**

Yr Athro Colin Williams

Darlith a draddodwyd yn Eisteddfod Genedlaethol Eryri a'r Cyffiniau, 2005.

**Staying the Course: Factors Influencing L2 Learner Dropout and Suggested Remedial Actions**

Dr Tim Jilg

**Catalog Archif Undeb Cenedlaethol Athrawon Cymru**

Dr E. Wyn James, Peter Keelan a'r Dr Rhodri Llwyd Morgan

**Gwefan Ann Griffiths**

Dr E. Wyn James

Gwefan ar gyfer astudio bywyd a gwaith Ann Griffiths (1776-1805), un o feirdd ac emynwyr pwysicaf Cymru, a bardd Cristnogol o faintioli rhyngwladol.



## Profiad Gwaith



Dros sawl blwyddyn bellach, mae myfyrwyr y flwyddyn olaf wedi bod yn treulio cyfnod yn gwneud profiad gwaith mewn gweithleoedd Cymraeg fel rhan o'r modiwl Cymraeg y Gweithle. Dyma fodiwl blaengar sydd yn rhoi blas i fyfyrwyr ar y modd y defnyddir y Gymraeg mewn gwahanol yrfaedd. Aeth myfyrwyr i weithio mewn sefydliadau fel S4C, BBC, Bwrdd yr Iaith Gymraeg, ACCAC, Agenda, Ffilmiau'r Nant, Cyngor Cefn Gwlad Cymru a chwmnïau cyfieithu (Prysg, Trosol, Testun, adran gyfieithu Cynulliad Cenedlaethol Cymru), a hefyd mewn ysgolion lleol. Bu'r datblygiad hwn yn llwyddiant ysgubol, ac y mae sawl myfyrwr bellach wedi cael cynnig swydd barhaol yn y sefydliad y bu'n gweithio ynddo.

# Gyrfaoedd

Mae agoriadau gyrfaol amrywiol iawn ar gyfer myfyrwyr sy'n graddio yn y Gymraeg. Bob blwyddyn, bydd myfyrwyr o Ysgol y Gymraeg yn mynd i swyddi sydd yn gysylltiedig â'r cyfryngau a chyfieithu. Bydd eraill yn dechrau ar yrfa ym myd gweinyddu, ac eraill yn mynd i ddysgu. Bydd nifer hefyd yn aros yn yr Ysgol i astudio am radd uwch: MA, MPhil, neu PhD.



Ond dim ond cyfran o'n myfyrwyr a fydd yn dilyn y llwybrau hynny: mae agoriadau eang iawn ar gyfer pobl a chanddynt gymwysterau yn y Gymraeg, gwybodaeth eang am Gymru a'i diwylliant, a sgiliau da wrth gyflwyno gwybodaeth, ar lafar ac yn ysgrifenedig. Er enghraifft, mae cyn-fyfyrwyr o Ysgol y Gymraeg, Prifysgol Caerdydd yn gweithio mewn sefydliadau megis Amgueddfa Werin Cymru, Bwrdd yr Iaith Gymraeg, y Cynulliad Cenedlaethol, a'r Llyfrgell Genedlaethol. Mae eraill yn gweithio ym myd marchnata a chyhoeddi llyfrau, rhai yn rheoli personél neu yn rheoli mewn siopau mawrion, a sawl un wedi ennill cymwysterau proffesiynol mewn meysydd megis gwaith cymdeithasol a'r gyfraith.



## Cysylltiadau â Phatagonia

Os dewch i Swyddfa'r Ysgol, byddwch yn cyfarfod ag Alicia Arthur, gwraig o Batagonia sydd ers peth amser bellach yn gynorthwydd gweinyddol yma. Cewch ddewis felly o dair iaith – y Gymraeg, y Sbaeneg a'r Saesneg. Ond mae gennym gysylltiadau eraill hefyd â'r Wladfa. Hyd yn ddiweddar, bu'r Athro Robert Owen Jones, ynghyd â'r cynorthwy-ydd ymchwil



Walter Brooks, yn gweithio ar ddau brosiect a ariannwyd gan Ymddiriedolaeth Leverhulme ('Goroesiad iaith? Y Gymraeg a'r Gymuned Gymreig yn y Wladfa' a 'Deinameg Adfywiad iaith yn Chubut') sy'n canolbwyntio ar gymdeithaseg y Gymraeg (1900 – 2000) yn Nyffryn Camwy ac yng ngodre'r Andes. Bellach, mae Walter yn ysgrifennu traethawd PhD ar 'Swyddogaeth llenyddiaeth greadigol yn y wasg gyfnodol Gymraeg yn Ariannin, 1865-1945' yn ein Canolfan Uwchefrydiau Cymry America, tra bo ei wraig, Geraldine Lublin, yn gweithio ar hunaniaeth y Cymry ym Mhatagonia. Rydym hefyd yn croesawu myfyrwyr o Batagonia i'n Cwrs Haf bob blwyddyn, cwrs a ddarperir gan ein Canolfan Cymraeg i Oedolion. Ymunant â myfyrwyr o bob cwr o'r byd, gan gynnwys Ffrainc, Yr Almaen, Gwlad Pwyl, Sbaen, De Affrica, Brasil, America a Japan.

## Cynllun Sabothol Cymraeg

Mae Ysgol y Gymraeg yn un o ddau leoliad sydd yn cynnig y Cynllun Sabothol Cymraeg. Nod y cynllun hwn, a noddir gan Lywodraeth Cynulliad Cymru, yw cynyddu hyder a sgiliau athrawon, darlithwyr neu hyfforddwyr wrth ddefnyddio'r Gymraeg ar lafar ac yn ysgrifenedig. Bydd y cwrs yn eu paratoi i ddysgu drwy gyfrwng y Gymraeg neu'n ddwyieithog. Am ragor o fanylion, gweler [www.cynllunsabothol.org](http://www.cynllunsabothol.org).



## Prifysgol Colgate

Bob blwyddyn, yn ystod semester y gwanwyn, daw myfyrwyr o Brifysgol Colgate (Madison County, Efrog Newydd, UDA) draw i Brifysgol Caerdydd fel rhan o'u Rhaglen Astudio Dramor. Yn ogystal ag astudio eu pynciau gradd, rhoddir cyfle unigryw i bob un o'r myfyrwyr hyn astudio modiwlau yn Ysgol y Gymraeg, sef Diwylliant ac Astudiaethau Gwerin Cymru, Cymru a'r Gymraeg, a Llenyddiaeth Gymraeg Fodern. Un o uchafbwyntiau'r Rhaglen yw treulio penwythnos yng ngorllewin Cymru, a chael cyfle i ymweld â chartref Dylan Thomas yn Nhalacharn yng nghwmni un o Ddarlithwyr Cysylltiol yr Ysgol, sef y Prifardd T James Jones, sy'n awdur ac yn fardd o fri, ac yn gyn-enillydd y Goron a'r Gadair yn yr Eisteddfod Genedlaethol.



Ffôn: 029 2087 4843  
Ebost: [Cymraeg@Caerdydd.ac.uk](mailto:Cymraeg@Caerdydd.ac.uk)  
Gwefan: [www.caerdydd.ac.uk/cymraeg](http://www.caerdydd.ac.uk/cymraeg)